



LJEKARSKA /LIJEČNIČKA KOMORA KANTONA SARAJEVO

Na osnovu člana 223. Zakona o zdravstvenoj zaštiti F BiH, kao i na osnovu člana 24. Statuta Komore, Skupština Ljekarske – Liječničke komore Kantona Sarajevo dana 12.12.2024. godine usvojila je:

STATUT

LJEKARSKE-LIJEČNIČKE KOMORE KANTONA SARAJEVO

(prečišćeni tekst)

I OSNOVNE ODREDBE

Član 1.

Ovim Statutom uređuju se: naziv i sjedište, ciljevi i djelatnosti, zastupanje i predstavljanje, organi, nadležnosti i ovlasti, izbor, imenovanja i opozivi, trajanje mandata, kvorum i pravila glasanja, oblik i sadržaj pečata, oblik i sadržaj znaka, časopis, sticanje i raspolaganje imovinom, način finansiranja i došenja finansijskog izvještaja o radu, postupak za donošenje, izmjene ili dopune Statuta i drugih općih akata, uvjeti i način učlanjenja, prestanak članstva, prava, dužnosti i odgovornosti članova, sadržaj, način i rokovi stručnog usavršavanja članova, postupak izdavanja, obnavljanja i oduzimanja licence, uslove pod kojima se razmatra obnavljanje odobrenja, način vođenja registra licenciranih članova, granice, način i druga pitanja u vezi sa ostvarivanjem javnih ovlaštenja, kao i način obavljanja drugih poslova utvrđenih Zakonom te ostala pitanja od značaja za rad Ljekarske-Liječničke komore Kantona Sarajevo.

II NAZIV, SJEDIŠTE I PODRUČJE DJELOVANJA

Član 2.

Naziv Komore je: "Ljekarska-Liječnička komora Kantona Sarajevo" (u daljem tekstu: Komora).

Član 3.

Sjedište Komore je u Sarajevu.

Član 4.

Komora djeluje na području Kantona Sarajevo (u daljem tekstu: KS).

Član 5.

Komora je samostalno i neovisno strukovno udruženje doktora medicine (u daljem tekstu: ljekara) koji imaju prebivalište ili obavljaju djelatnost na području KS.

Član 6.

Komora ima svojstvo pravnog lica i upisana je u registar kod nadležnog Suda u Sarajevu.

Član 7.

Komora može osnivati privredne i druge subjekte u skladu sa Zakonom i ovim Statutom.

III PEČAT, ZNAK I ČASOPIS

Član 8.

- (1) Komora ima svoj znak.
- (2) Komora ima pečat prečnika 3 cm sa ispisanim tekstom: „Ljekarska-Liječnička komora Kantona Sarajevo”.
- (3) U sredini pečata je znak Komore koji je regulisan odlukom.
- (4) O načinu upotrebe pečata odluku donosi Upravni odbor Komore.

Član 9.

Komora je izdavač časopisa „Sarajevo Medical Journal“ i nosilac srodnog prava na koji ima moralna i imovinska prava i koji je upisan u knjigu evidencije autorskih djela koju vodi Institut za intelektualnu svojinu/vlasništvo BiH.

IV CILJEVI I DJELATNOSTI

Član 10.

Ciljevi Komore su:

- 1) očuvanje i zaštita interesa i digniteta ljekarske profesije,
- 2) zadovoljavanje stručnih i ličnih potreba ljekara,
- 3) osiguranje uvjeta za organiziran nastup ljekara prema državnim organima, udruženjima, zdravstvenim ustanovama, proizvođačima i dobavljačima lijekova, medicinskih sredstava i opreme,
- 4) podrška kontinuiranom stručnom usavršavanju ljekara,
- 5) zaštita zdravlja građana.

Član 11.

- (1) Komora štiti i zastupa interese ljekarske profesije, brine o pravilnom ponašanju i ugledu ljekara i ljekarske struke, s tim da ispunjava slijedeće zadatke:
- (2) Vodi registar svojih članova, na način utvrđen Pravilnikom o registru članova Komore;
- (3) Donosi Kodeks medicinske etike i deontologije, prati i nadzire njegovo provođenje te preduzima odgovarajuće mjere u slučaju njegovog kršenja;
- (4) Daje mišljenje u skladu sa čl.184 Zakona o zdravstvenoj zaštiti;
- (5) Daje mišljenje kantonalnom ministru o opravdanosti izdavanja, produženja ili oduzimanja odobrenja za obavljanje poslova privatne prakse, te početka, proširenja, promjene i prestanka rada zdravstvenih ustanova sa pozicije i očuvanja profesije koju zastupa;
- (6) Certifikuje članove Komore za upravljanje novim zdravstvenim tehnologijama, na osnovu načina i uslova za upravljanje novim zdravstvenim tehnologijama koje utvrđuje federalna komora;

- (7) Utvrđuje maksimalnu cijenu zdravstvenih usluga za privatnu praksu koja ne ostvaruje prihode putem zavoda zdravstvenog osiguranja kantona i ovjerava cjenovnik zdravstvenih usluga privatne prakse;
- (8) Daje mišljenje na cijene zdravstvenih usluga iz dobrovoljnog zdravstvenog osiguranja;
- (9) Zastupa interese svojih članova kod sklapanja ugovora sa Zavodom zdravstvenog osiguranja KS i drugim osiguravajućim zavodima;
- (10) Obezbjeduje zaštitu građanima u ostvarivanju prava s obzirom na kvalitet, sadržaj i vrstu zdravstvene usluge koja im se pruža;
- (11) Po službenoj dužnosti izdaje, obnavlja i oduzima licence svojim članovima na osnovu zajedničkih kriterija Ljekarske/Liječničke komore FBiH i u skladu sa Pravilnikom o licenciranju članova Komore;
- (12) Učestvuje pri utvrđivanju standarda i normativa zdravstvenih usluga;
- (13) Daje stručna mišljenja kod pripreme propisa koji su od uticaja na razvoj zdravstvene struke;
- (14) Organizuje dodatno usavršavanje za proširenje djelatnosti unutar struke s obzirom na nove dijagnostičko-terapijske metode;
- (15) Propisuje način oglašavanja i način isticanja naziva privatne prakse te utvrđuje slučajeve koji se ne smatraju reklamiranjem zdravstvenih usluga;
- (16) Daje saglasnost za zdravstvenu ustanovu i privatnu praksu, odnosno saglasnost za zdravstvenog radnika za obavljanje metoda i postupaka alternativne medicine;
- (17) Obavlja i druge poslove određene Zakonom o zdravstvenoj zaštiti, Zakonom o liječništvu i Statutom.

V ČLANSTVO

Član 12.

- (1) Ljekari koji rade na području KS, nakon položenog stručnog ispita, obavezno se upisuju u registar ljekara Komore, čime stiču pravo na izdavanje licence.
- (2) Članstvo u komori je pravo i obaveza za sve liječnike, državljane BiH kao i liječnike strane državljane kojima je odobren rad na području Kantona Sarajevo saglasno pozitivnim zakonskim propisima, koji obavljaju poslove i zadatke svog stručnog zvanja na području Kantona Sarajevo, potpisnici su Odluke o pristupanju Komori, prihvataju Kodeks medicinske etike i deontologije i Statut Komore.

Član 13.

- (1) Član Komore postaje se podnošenjem pismenog zahtjeva za upis u registar članova Komore.
- (2) Uz zahtjev, iz stava 1.ovog člana, ljekar je dužan dostaviti dokumentaciju bliže određenu Pravilnikom o licenciranju i Pravilnikom o registru Komore (u daljem tekstu: Pravilnik Komore), nakon čega Komora provodi postupak utvrđen Pravilnikom.

Član 14.

Članstvo u Komori prestaje:

- (1) Neplaćanjem članarine, tri (3) mjeseca uzastopno, osim u slučajevima predviđenim Odlukom o upisnici i visini iznosa članarine za članove Komore;
- (2) Oduzimanjem odobrenja za samostalan rad;
- (3) Na zahtjev člana Komore.
- (4) Smrću člana Komore
- (5) Nakon prestanka članstva u Komori, predsjednik Komore donosi rješenje o ispisu (brisanju) iz registra Komore i oduzimanju licence u skladu sa Pravilnikom Komore.

Član 15.

Prava članova Komore su:

- (1) Prava na usluge Komore, koje proizilaze iz člana 11. Statuta;
- (2) Pasivno i aktivno pravo glasa, pravo sudjelovanja u svim organima Komore;
- (3) Učešće na seminarima i drugim oblicima stručnog usavršavanja, koje organizuje Komora;
- (4) Pravo na besplatnu objavu radova u časopisima Komore;
- (5) Pravo na stalno stručno savjetovanje i pravovremenu informisanost.

Član 16.

Dužnosti članova Komore su:

- (1) Poštivanje svih odluka i akata Komore;
- (2) Pravovremeno obavješćavanje Komore o svim podacima, u skladu sa Pravilnikom Komore;
- (3) Redovno plaćanje članarine, osim u slučajevima predviđenim ovim Statutom.

VI SADRŽAJ, NAČIN I ROKOVI STRUČNOG USAVRŠAVANJA ČLANOVA

Član 17.

- (1) Ljekari imaju pravo i obavezu kontinuiranog i trajnog stručnog usavršavanja.
- (2) Kontinuirano i trajno stručno usavršavanje, iz stava 1.ovog člana, obavlja se putem različitih oblika stručnog usavršavanja, sa ciljem poboljšanja kvaliteta zdravstvenih usluga koje ljekari pružaju u okviru svog stručnog naziva.
- (3) Komora donosi Plan stručnog usavršavanja članova za svaku kalendarsku godinu.
- (4) Sadržaj, način te rokove stručnog usavršavanja ljekara – članova Komore bliže uređuje Pravilnik o stručnom usavršavanju.

VII ORGANI, NADLEŽNOSTI I OVLAŠTI

Član 18.

Organi Komore su:

- 1) Skupština,
- 2) Upravni odbor
- 3) Predsjednik i podpredsjednik,
- 4) Predsjednik i podpredsjednik Skupštine
- 5) Sud Komore,
- 6) Tužitelj Komore,
- 7) Branilac Komore
- 8) Nadzorni odbor,
- 9) Generalni sekretar,
- 10) Stručna služba Komore,
- 11) Odbori Komore.

Član 19.

Prilikom delegiranja u organe Komore, poštuje se princip ravnomjerne zastupljenosti ljekara svih profila (ljekari iz primarne, sekundarne i tercijarne zdravstvene zaštite, ljekari svih specijalizacija/ subspecijalizacija, ljekari iz javne i privatne prakse i sl.).

Član 20.

Ukoliko delegatu Skupštine, odnosno članu Upravnog odbora, Suda, Tužitelja, Branioca, Nadzornog odbora ili Komisije Komore, u skladu sa članom 14. Statuta Komore, prestane članstvo u Komori, njegova Izborna jedinica imenuje novog delegata, odnosno člana organa Komore.

Član 21.

- (1) Mandat delegata Skupštine, članova drugih organa i Komisija Komore je četiri (4) godine.
- (2) Isti članovi Komore mogu biti ponovo birani za delegate Skupštine, članove drugih organa i Komisija Komore, najviše dva mandata uzastopno ili ukoliko im se ne izrekne neka od disciplinskih mjera .
- (3) U jednom mandatu, član Komore KS može obnašati samo jednu funkciju i to kao organ Komore ili kao član jednog od stalnih odbora Komore.
- (4) Iznimno, od stava 1. ovog člana, u slučajevima kada delegati Skupštine prestanu obavljati poslove doktora medicine u zdravstvenim ustanovama koje zastupaju u organima Komore, kada napuste prebivalište na području Kantona ili kada neopravdano ne dolaze na sjednice organa Komore, bit će razriješeni dužnosti i za vrijeme trajanja mandata, o čemu odluku donosi Upravni odbor Komore.
- (5) U slučajevima iz prethodnog stava, na mandatni period do isteka mandata Skupštine, imenuje se novi delagat Skupštine.

1) SKUPŠTINA

Član 22.

- (1) Skupština je najviši organ upravljanja Komore.
- (2) Izbor za delegate Skupštine Komore, Tijela Komore, stalne odbore Komore, vrši se u skladu sa Pravilnikom o izboru tijela, Ljekarske/Liječničke komore KS (u daljem tekstu Pravilnik o izborima).
- (3) Predsjednik i potpredsjednik Skupštine čine radno predsjedništvo Skupštine Komore.
- (4) Skupštinu zakazuje Predsjednik Skupštine Komore, u skladu sa Poslovníkom o radu Skupštine.
- (5) Svaka zdravstvena ustanova čiji je osnivač Kanton Sarajevo, predstavlja jednu izbornu jedinicu. sve privatne ustanove zajedno predstavljaju jednu izbornu jedinicu.
- (6) U zdravstvenim ustanovama, na području Kantona, na svakih dvadeset (20) ljekara bira se jedan (1) delegat, a zdravstvene ustanove, koje imaju manje od dvadeset (20) ljekara, biraju/delegiraju jednog delegata.
- (7) Predloženi delegati obavezno potpisuju izjave da prihvataju dužnost delegata, odnosno člana odgovarajuće Komisije ili drugog tijela Komore.
- (8) Nakon prijedloga iz zdravstvenih ustanova, u pismenoj formi i potpisa izjava, konačan broj delegata utvrđuje Upravni odbor.

Član 23.

- (1) Skupština se saziva najmanje jedanput godišnje, a saziva je predsjednik Skupštine na inicijativu predsjednika Komore ili Upravnog odbora, pismenim putem, u skladu sa Poslovníkom o radu Skupštine.
- (2) Poziv za Skupštinu, uz prijedlog dnevnog reda, mora se dostaviti delegatima najkasnije 15 (petnaest) dana prije održavanja sjednice Skupštine.
- (3) Zahtjev za sazivanje vanredne sjednice Skupštine, predsjedniku Komore, mogu podnijeti Upravni odbor ili najmanje jedna trećina (1/3) delegata Skupštine u skladu sa Poslovníkom o radu vanredne Skupštine.
- (4) Predsjednik Komore mora sazvati vanrednu sjednicu Skupštine najkasnije u roku od 30 dana po prijemu zahtjeva iz prethodnog stava.
- (5) Ukoliko sjednicu Skupštine ne sazove u roku iz prethodnog stava, predlagateljji mogu sami sazvati vanrednu sjednicu Skupštine.
- (6) Vanredna Skupština Komore može biti Izborna ukoliko inicijativu za njeno sazivanje podrži 1/3 delegata Skupštine, a način rada, imenovanja i razrješenja se uređuju Poslovníkom o radu Skupštine Komore koji se usvaja na Vanrednoj sjednici u skladu sa članom 25 Statuta.

Član 24.

Skupština Komore obavlja slijedeće poslove:

1. Donosi Statut Komore, izmjene i dopune Statuta
2. Donosi Kodeks medicinske etike i deontologije,
3. Donosi Pravilnik o odgovornosti članova Komore,
4. Donosi Pravilnik o finansijskom poslovanju Komore,

5. Donosi Poslovnik o radu Skupštine, Tužitelja i Suda Komore te Nadzornog odbora,
6. Razmatra i usvaja Izvještaj o radu i Izvještaj o finansijskom poslovanju Komore,
7. Razmatra i usvaja Plan i program rada i Finansijski plan Komore,
8. Donosi odluku o visini upisnine i članarine Komore,
9. Donosi odluku o sjedištu Komore,
10. Bira i razrješava predsjednika i podpredsjednike Komore,
11. Bira i razrješava predsjednika i podpredsjednika Skupštine,
12. Bira i razrješava članove Upravnog odbora Komore,
13. Bira i razrješava članove Nadzornog odbora Komore,
14. Bira i razrješava članove Suda Komore,
15. Bira i razrješava Tužitelja i Branioca Komore,
16. Odlučuje o povezivanju i saradnji Komore sa drugim srodnim udruženjima i organizacijama,
17. Donosi i druge odluke u skladu sa ovim Statutom i drugim aktima Komore.

Član 25.

- (1) Skupština ima kvorum ako je prisutna nadpolovična većina (50% + 1) ukupnog broja izabranih delegata Skupštine.
- (2) Odluka Skupštine je punovažna ako je za nju glasala nadpolovična većina (50% + 1) ukupnog broja prisutnih delegata na sjednici Skupštine koja ima kvorum.

Član 26.

Način sazivanja sjednica Skupštine, način raspravljanja, odlučivanja i glasanja te druga pitanja od značaja za rad Skupštine uređuju se Poslovnikom o radu Skupštine.

2) UPRAVNI ODBOR

Član 27.

- (1) Upravni odbor je Upravni organ Komore koje sprovodi odluke, zaključke i smjernice Skupštine.
- (2) Upravni odbor ima 9 članova i čine ga predstavnici primarne, sekundarne, tercijarne zdravstvene zaštite, odnosno za člana Upravnog odbora Komore može se prijaviti ljekar koji posjeduje važeću licencu Ljekarske – Liječničke komore Kantona Sarajevo.
- (3) Odluku o imenovanju članova Upravnog odbora donosi Skupština.
- (4) Članovi Upravnog odbora na prvoj konstituirajućoj sjednici, između sebe, biraju predsjednika Upravnog odbora .
- (5) Članovi organa Komore za svoj rad primaju naknadu u skladu sa finansijskim planom odobrenim od strane Skupštine Komore, a na prijedlog Upravnog odbora.

Član 28.

- (1) Mandat članova Upravnog odbora traje četiri godine, sa mogućnošću ponovnog izbora, u dva uzastopna mandata.
- (2) Članu Upravnog odbora može prestati mandat i prije isteka roka na koji je imenovan, i to u sljedećim slučajevima :
 - (3) Podnošenjem ostavke;
 - (4) Opozivom;
 - (5) Prestankom rada u Komori ;
- (6) Neopravdanim izostankom sa tri sjednice Upravnog odbora u toku jedne kalendarske godine.

Član 29.

Upravni odbor obavlja sljedeće poslove:

1. Donosi sve Pravilnike Komore, osim Pravilnika o izborima i imenovanjima organa Komore,
2. Donosi Poslovnike o radu organa i tijela Komore, osim Poslovnika o radu Skupštine i Nadzornog odbora,
3. Shodno odluci Skupštine Upravni odbor Ljekarske komore utvrđuje prečišćeni tekst Statuta i ostalih dokumenata.
4. Bira i razrješava članove Odbora i Komisija
5. Izvršava odluke i zaključke Skupštine,
6. Razmatra inicijative za donošenje i za izmjene i dopune općih akata Komore i odlučuje o istim te utvrđuje nacрте i prijedloge općih akata Komore,
7. Priprema materijale, informacije, analize i sl. za Skupštinu,
8. Donosi odluku o izboru generalnog sekretara Komore,
9. Utvrđuje blagajnički maksimum,
10. Utvrđuje cjenovnik usluga Komore,
11. Podnosi godišnji izvještaj Skupštini,
12. Odlučuje o žalbama na odluke predsjednika Komore,
13. Sarađuje sa Federalnim i Kantonalnim Ministarstvom zdravstva u obavljanju poslova i zadataka Komore u skladu sa zakonskim propisima, ovim Statutom i drugim općim aktima Komore,
14. Sarađuje sa Federalnim i Kantonalnim Zavodom zdravstvenog osiguranja i drugim osiguravajućim društvima,
15. Zastupa interese članova Komore kod sklapanja ugovora sa Federalnim Zavodom zdravstvenog osiguranja, odnosno Kantonalnim Zavodom zdravstvenog osiguranja i drugim osiguravajućim zavodima,
16. Sarađuje sa direktorima zdravstvenih ustanova u cilju što uspješnijeg obavljanja poslova i zadataka iz nadležnosti Komore,

17. Saraduje sa odgovarajućim udruženjima i ustanovama u državi BiH i inostranstvu,
18. Obavlja i druge poslove utvrđene ovim Statutom i drugim općim aktima Komore.

Član 30.

- (1) Sjednice Upravnog odbora saziva predsjednik ili u njegovom odsustvu zamjenik predsjednika Upravnog odbora i iste se održavaju u pravilu jednom mjesečno.
- (2) Upravni odbor ima kvorum ako je prisutna nadpolovična većina (50% + 1) ukupnog broja članova Upravnog odbora.
- (3) Odluka Upravnog odbora je punovažna ako je za nju glasala nadpolovična većina (50% + 1) ukupnog broja prisutnih članova na sjednici Upravnog odbora koja ima kvorum
- (4) Pitanja od značaja za rad Upravnog odbora uređuju se Poslovníkom o radu Upravnog odbora.

3) PREDsjedNIK I PODPREDsjedNIK KOMORE

Član 31.

- (1) Predsjednika i podpredsjednika Komore bira i razrješava Skupština Komore.
- (2) Kandidat za predsjednika i podpredsjednika Komore može biti svaki član Komore koji ispunjava kriterije i ako mu kandidaturu podrži najmanje 90 članova Komore (u skladu sa Pravilnikom o izborima).

Član 32.

- (1) Odluku o izboru predsjednika i podpredsjednika Komore Skupština donosi nadpolovičnom većinom (50% + 1) ukupnog broja prisutnih delegata na sjednici Skupštine koja ima kvorum.
- (2) Ako u prvom krugu, nijedan kandidat ne dobije većinu iz stava 1. ovog člana, prelazi se u drugi krug izbora između dva kandidata koja su u prvom krugu dobila najviše glasova.
- (3) U tom slučaju, za predsjednika Komore izabran je kandidat koji je dobio više glasova.

Član 33.

Mandat predsjednika i podpredsjednika Komore je četiri (4) godine. Mogu biti izabrani u najviše dva uzastopna mandata.

Član 34.

Predsjednik Komore obavlja sljedeće poslove:

1. Zastupa i predstavlja Komoru,
2. Izvršava odluke i zaključke Skupštine,
3. Učestvuje u radu Upravnog odbora, te provodi njihove odluke i zaključke,
4. Donosi rješenje o upisu u Registar i izdavanju odobrenja sa samostalan rad ili rješenje kojim se zahtjev odbija,
5. Donosi rješenje o oduzimanju odobrenja za samostalan rad u skladu sa pravnim aktima Komore,

7. Obavlja i druge poslove utvrđene ovim Statutom i drugim općim aktima Komore te one koje mu povjeri Skupština Komore.

Član 35.

(1) Potpredsjednik Komore mijenja predsjednika Komore u slučaju njegove odsutnosti ili spriječenosti.

(2) Potpredsjednik Komore obavlja i druge poslove utvrđene ovim Statutom i drugim općim aktima Komore te poslove koje mu povjeri predsjednik Komore.

Član 36.

U slučaju da predsjednik Komore ne može obavljati funkciju, obavljat će je potpredsjednik, najduže do izbora novog predsjednika.

Član 37.

(1) Predsjednik Komore je dužan podnijeti Izvještaj o radu Skupštini Komore.

(2) Za svoj rad, predsjednik i potpredsjednik Komore, odgovaraju Skupštini Komore.

Član 38.

Predsjednik i potpredsjednik Komore mogu biti razriješeni dužnosti i prije isteka mandata u skladu sa odredbama ovog Statuta i odredbama drugih općih akata Komore (Pravilnik o izborima tijela. Poslovnik o radu Skupštine. Pravilnik o disciplinskoj odgovornosti).

4) PREDSEDNIK I PODPREDSEDNIK SKUPŠTINE

Član 39.

(1) Predsjednik Skupštine saziva Skupštinu na inicijativu predsjednika Komore ili Upravnog odbora. U slučaju njegove spriječenosti Skupštinu saziva potpredsjednik Skupštine.

(2) Za svoj rad predsjednik i potpredsjednik Skupštine odgovaraju Skupštini Komore.

5) SUD KOMORE

Član 40.

Sud Komore razmatra i donosi odluke o povredama dužnosti i ugleda ljekarske struke.

Član 41.

(1) Sud Komore čine predsjednik, zamjenik predsjednika i tri (3) člana Suda.

(2) U slučaju da predsjednik Suda Komore ne može vršiti funkciju, obavljat će je zamjenik sa svim ovlastima predsjednika.

(3) Članove Suda bira Skupština iz reda članova Komore.

(4) Mandat Suda Komore traje četiri (4) godine s mogućnošću ponovnog izbora, u dva uzastopna mandata.

Član 42.

(1) Članove Suda Skupštini predlažu organizacione jedinice u javnim zdravstvenim ustanovama i strukovno udruženje privatne prakse za PZU, u privatnim zdravstvenim ustanovama.

(2) Predloženi članovi obavezno potpisuju izjave da prihvataju dužnost člana Suda Komore.

Član 43.

(1) Za razmatranje pojedinačnih postupaka, predsjednik Suda imenuje Vijeće od tri (3) člana, uključujući i predsjednika Suda.

(2) Vijeće Suda radi u sjednicama kojima prisustvuju svi imenovani članovi Vijeća.

(3) Odluka Vijeća Suda je punovažna ako je za nju glasala nadpolovična većina (50% + 1) ukupnog broja imenovanih članova Vijeća.

(4) Žalbe na odluke Suda Komore razmatra Sud Komore Ljekarske/Liječničke komore FBiH.

(5) Rad Suda Komore odvija se u skladu sa odredbama Pravilnika o odgovornosti članova Komore i Poslovnika o radu Suda Komore.

Član 44.

Sud Komore podnosi Izvještaj o radu Skupštini Komore.

6) TUŽITELJ KOMORE

Član 45.

(1) Tužitelja Komore čine Tužitelj i dva zamjenika Tužitelja.

(2) Tužitelja i zamjenike Tužitelja Komore, iz reda članova, bira Skupština Komore.

(3) Mandat Tužitelja Komore traje četiri (4) godine s mogućnošću ponovnog izbora, u dva uzastopna mandata.

Član 46.

(1) Tužitelja Komore predlažu predlažu organizacione jedinice u javnim zdravstvenim ustanovama i strukovno udruženje privatne prakse za PZU, u privatnim zdravstvenim ustanovama.

(2) Predloženi članovi obavezno potpisuju izjave da prihvataju dužnost Tužitelja Komore.

Član 47.

(1) Tužitelj Komore zahtjevom pokreće postupak za utvrđivanje povreda dužnosti i ugleda ljekarske struke.

(2) Postupak iz stava 1. ovog člana pokreće se pred Sudom Komore.

(3) Rad Tužitelja Komore odvija se u skladu sa odredbama Pravilnika o odgovornosti članova Komore i Poslovnika o radu Tužitelja Komore.

7) BRANILAC KOMORE

Član 48.

(1) Branioca Komore bira Skupština Komore.

(2) Branilac Komore je nezavisni organ Komore koji po službenoj dužnosti obavlja poslove pravne zaštite i zastupanja članova Komore u postupcima pred sudovima, arbitražama i drugim državnim organima i organizacijama u zemlji i inostranstvu, a u kojima su istaknuti odštetni i drugi zahtjevi iz oblasti zdravstvene djelatnosti.

(3) Branilac Komore angažuje sudske vještake medicinske struke sa liste stalnih sudskih vještaka, kao i druge medicinske stručnjake prema svom nahođenju i procijeni predmeta, a shodno vrsti spora. Branilac Komore u dogovoru sa Predsjednikom Komore predlaže tim za provođenje sudske zaštite i zastupanja članova Komore.

(4) Branilac Komore radi u skladu sa Pravilnikom o odgovornosti liječnika i Pravilnika o osiguranju za slučaj utvrđivanja profesionalne odgovornosti.

(5) O uslugama Branilaca Komore i eventualnim sudskim troškovima od slučaja do slučaja odlučuje Upravni odbor.

(6) Mandat Branilaca Komore traje četiri (4) godine s mogućnošću ponovnog izbora, u dva uzastopna mandata.

8) NADZORNI ODBOR

Član 49.

(1) Nadzorni odbor se bira na Skupštini tajnim glasanjem između više kandidata koje predlažu organizacione jedinice Komore.

(2) Nadzorni odbor broji tri / 3 / člana.

(3) Predsjednika Nadzornog odbora imenuje i razrješava Skupština .

(4) Nadzorni odbor je dužan najmanje dva puta godišnje pregledati finansijsko poslovanje Komore i završni račun.

(5) Nadzorni odbor razmatra zakonitost odluka i zaključaka koje donose organi Komore.

(6) Nadzorni odbor o svom radu podnosi izvještaje Skupštini, te predlaže usvajanje završnog računa.

Član 50.

(1) Nadzorni odbor vrši kontrolu provođenja odredaba Statuta, odluka Skupštine i drugih organa Komore te kontrolu finansijsko-materijalnog poslovanja Komore.

(2) Nadzorni odbor podnosi godišnji izvještaj o svom radu Skupštini Komore.

Član 51.

(1) Rad Nadzornog odbora odvija se u skladu sa odredbama Poslovnika o radu Nadzornog odbora Komore.

(2) Mandat članova Nadzornog odbora Komore traje četiri (4) godine s mogućnošću ponovnog izbora, u dva uzastopna mandata.

9) GENERALNI SEKRETAR

Član 52.

- (1) Generalni sekretar Komore surađuje sa predsjednikom Komore u pripremi sjednica Skupštine i Upravnog odbora Komore, kao i u drugim poslovima u radu Komore.
- (2) Odgovoran je za zapisnike, odluke i izvještaje sa sjednica Skupštine i Upravnog odbora Komore, stara se o dostavljanju poziva za sjednice i korespondenciji u administrativnim poslovima Komore.
- (3) Izvještaj o radu podnosi predsjedniku Komore.
- (4) Na funkciju generalnog sekretara bira se diplomirani pravnik na osnovu javnog konkursa i kriterija koje utvrdi UO. Za generalnog sekretara izuzetno može biti izabran i doktor medicine.

10) STRUČNA SLUŽBA KOMORE – ADMINISTRATOR ZA REGISTAR, FINANSIJE I ADMINISTRACIJU

Član 53.

Administrator obavlja poslove vođenja Registra ljekara Ljekarske/Liječničke komore Kantona Sarajevo, obavlja poslove vođenja finansija Komore, vrši korenspondenciju administrativnih poslova Komore, obavlja kancelarijsko poslovanje, obavlja i druge poslove određene Statutom ili opštim aktima Komore. Za svoj rad odgovara Predsjedniku Komore.

11. ODBORI KOMORE

Član 54.

- (1) Komora ima stalne i povremene odbore kao svoja radna tijela.
- (2) Stalni odbori Komore su :
 - 1 Odbor za medicinsku etiku i deontologiju,
 - 2 Odbor za edukaciju, zdravstvenu informatiku i kontinuirano usavršavanje,
 - 3 Odbor za stručna i staleška pitanja,
 - 4 Odbor za ekonomska, administrativna i finansijska pitanja.
- (3) Svaki odbor ima po 3 člana, članove Odbora imenuje Upravni odbor, a predsjednike odbora imenuju članovi odbora na prvoj konsultativnoj sjednici nakon provedenih izbora.
- (4) Odbori moraju imati u svom sastavu predstavnike iz svih oblasti zdravstvene djelatnosti.
- (5) Odbori mogu imenovati stručne odnosno ekspertne radne grupe za obavljanje svojih poslova.
- (6) Način rada odbora uredit će se poslovnica o radu odbora Komore koje donosi Upravni odbor .
- (7) Odbori donose odluku većinom glasova od ukupnog broja članova odbora, ukoliko ovim Statutom ili aktima Komore nije drugačije određeno.
- (8) Mandat Odbora Komore traje četiri (4) godine s mogućnošću ponovnog izbora, u dva uzastopna mandata.

Član 55.

Odbor za medicinsku etiku i deontologiju obavlja sljedeće poslove :

1. oblikuje Kodeks medicinske etike i deontologije ;
2. prati i nadzire provođenja pravila medicinske etike i deontologije, te poduzima odgovarajuće mjere u slučaju kršenja;
3. pruža zaštitu građanima u ostvarivanju prava s obzirom na kvalitet , sadržaj i vrstu zdravstvene usluge koja im se pruža ;
4. koordinira odnose među članovima , te aktivno sudjeluje u rješavanju nastalih sporova ;
5. raspravlja i daje mišljenja odnosno tumačenja o pojedinim pitanjima iz medicinske etike i deontologije ;
6. svoj rad koordinira sa ostalim organima Komore ;
7. obavlja i druge poslove određene Statutom ili aktima Komore.

Član 56.

Odbor za edukaciju, zdravstvenu informatiku i kontinuirano usavršavanje obavlja sljedeće poslove :

1. organizuje u saradnji sa medicinskim fakultetima, te stručno-medicinskim društvima dodatno usavršavanje za proširenje djelatnosti unutar struke, uzimajući u obzir nove dijagnostičko-terapijske metode, te trajno obrazovanje svojih članova;
2. propisuje uvjete stručnog usavršavanja liječnika i koordinira stručno usavršavanje članova Komore / sudjelovanje na kursovima za obnavljanje znanja, sudjelovanje na stručnim i naučnim sastancima, kongresima i simpozijima, objavljivanje stručnih i naučnih radova i sl.
3. predlaže način obavljanja stručnih ispita liječnika ;
4. koordinira svoj rad s ostalim organima Komore ;
5. obavlja i druge poslove određene Statutom ili aktima Komore.
6. izdaje preporuke za upotrebu novih informacionih tehnologija u medicini;
7. koordinira aktivnosti Komore iz oblasti zdravstvene informatike sa državnim organima i drugim sličnim tijelima kantona u Federaciji Bosne i Hercegovine;
8. obavlja i druge poslove određene Statutom ili drugim aktima Komore.

Član 57.

Odbor za stručna i staleška pitanja obavlja sljedeće poslove :

1. vodi brigu i nadzor o obimu i kvalitetu stručnog djelovanja, te o drugim stručnim pitanjima u skladu sa Zakonom o zdravstvenoj zaštiti;
2. zastupa interese svojih članova pri sklapanju ugovora sa zavodima osiguranja i reosiguranja i drugim osiguravajućim zavodima;
3. sudjeluje pri utvrđivanju standarda i normativa zdravstvenih usluga;
4. učestvuje u pregovorima prilikom sklapanja ugovora o radu između poslodavaca i članova Komore;
5. formira fondove za pomoć svojim članovima i članovima uže porodice, kao i za organizovano finansiranje pripravničkog staža zdravstvenih radnika;

6. brine se o materijalnim i drugim interesima svojih članova;
7. brine se za pravnu pomoć svojim članovima i organizuje mogućnost osiguranja protiv odštetnih zahtjeva iz oblasti zdravstvene djelatnosti;
8. provodi stručni nadzor u oblasti zdravstvene djelatnosti, te predlaže odgovarajuće mjere za poboljšanje ove djelatnosti ;
9. svoj rad koordinira sa radom drugih organa Komore;
10. obavlja i druge poslove određene Statutom ili aktima Komore.

Član 58.

Odbor za ekonomska, administrativna i finansijska pitanja.

1. predlaže godišnji plan i program finansijskog i materijalnog poslovanja Komore;
2. sudjeluje u izradi propisa iz oblasti finansiranja zdravstva;
3. izrađuje prijedlog cijena usluga Komore;
4. svoj rad koordinira sa radom ostalih organa Komore;
5. obavlja i druge poslove određene Statutom ili aktima Komore.
6. brine se o materijalnim i drugim interesima svojih članova;
7. brine se za pravnu pomoć svojim članovima i organizuje mogućnost osiguranja protiv odštetnih zahtjeva iz oblasti zdravstvene djelatnosti;
8. vodi evidenciju propisa koji se odnose na zdravstvenu djelatnost, te pokreće inicijativu za izmjene i dopune istih saglasno interesima liječničke profesije;
9. daje stručna mišljenja prilikom pripreme propisa od uticaja na razvoj zdravstvene struke;
10. svoj rad koordinira sa radom drugih organa Komore ;
11. obavlja i druge poslove određene Statutom ili aktima Komore.

VIII IMOVINA I FINANSIRANJE KOMORE

Član 59.

- (1) Komora ima svoj žiro-račun preko kojeg obavlja poslovanje.
- (2) Finansijsko i materijalno poslovanje Komora vodi u skladu sa odredbama Zakona i Pravilnika o finansijskom poslovanju Komore.
- (3) Komora ne raspolaže sredstvima za osnivanje i početak rada.
- (4) Osnivači Komore ne odgovaraju za obaveze Komore.

Član 60.

(1) Izvori finansiranja Komore su:

1. upisnine,
2. članarine,
3. naknade za usluge Komore,
4. donacije i zavještanja,

5. prihodi od izdavanja publikacija,

6. ostali prihodi.

(2) Sve prihode, koje ostvari, Komora će isključivo koristiti za finansiranje djelatnosti i aktivnosti u skladu sa Zakonom i ovim Statutom.

Član 61.

Višak prihoda nad rashodima Komora može oploditi na jedan od mogućih zakonskih načina.

Član 62.

(1) Komora zaključuje ugovore i vrši druge pravne poslove i radnje u okviru djelatnosti koju obavlja.

(2) U pravnom prometu sa trećim licima Komora odgovara imovinom kojom raspolaže.

IX JAVNOST RADA

Član 63.

(1) Rad Komore je javan.

(2) Organi Komore su dužni da informišu članstvo o svim pitanjima o kojima se raspravlja ili donose određene odluke, i to putem biltena, publikacija i sl.

(3) Samo izuzetno, u slučajevima predviđenim Zakonom, Komora može donijeti odluku kojom će utvrditi izuzetak od saopćavanja informacija.

X NAGRADE I PRIZNANJA

Član 64.

(1) Za postignute uspjehe u radu i savjesno izvršavanje zadataka, u znak priznanja i u cilju isticanja primjera, Komora može pohvaliti i nagraditi pojedine članove, organe i Komisije Komore.

(2) Za ostvarenu suradnju sa Komorom i pomoć Komori, Komora može pohvaliti i nagraditi pojedina udruženja, ustanove, organizacije i druga pravna i fizička lica.

Član 65.

(1) Oblici pohvala i nagrada su:

1. Javna pohvala,

2. Priznanje,

3. Plaketa .

(2) Odluku o dodjeli pohvala i nagrada donosi Skupština Komore.

(3) Javne pohvale, priznanja i plakete dodjeljuju se u pismenom obliku koji utvrđuje Upravni odbor Komore.

XI AKTI KOMORE

Član 66.

Akti Komore su:

1. Statut Ljekarske komore KS;
2. Kodeks medicinske etike i deontologije;
3. Pravilnik o finansijskom poslovanju Komore;
4. Pravilnik o izboru tijela Ljekarske/Liječničke Komore KS.
5. Pravilnik o licenciranju;
6. Pravilnik o odgovornosti članova Komore;
7. Pravilnik o stručnom usavršavanju ljekara;
8. Pravilnik o vođenju registra članova Federalne Ljekarske komore ;
9. Poslovnik o radu Skupštine;
10. Poslovnik o radu Vanredne Skupštine
11. Poslovnik o radu Upravnog odbora Komore;
12. Poslovnik o radu Suda Komore;
13. Poslovnik o radu Tužitelja Komore;
14. Poslovnik o radu Nadzornog odbora;
15. Poslovnik o radu Odbora/Komisija Komore;

XII POSTUPAK IZDAVANJA, OBNAVLJANJA I ODUZIMANJA ODOBRENJA - LICENCI ZA SAMOSTALAN RAD LIJEČNIKA

1. Izdavanje odobrenja

Član 67.

(1) Komora izdaje odobrenje za samostalan rad liječnicima Kantona.

(2) Odobrenje za samostalan rad je javna isprava kojom ljekar/liječnik stiče pravo da samostalno obavlja posove i zadatke svog stručnog zvanja. Odobrenje za samostalan rad važi u skladu sa Pravilnikom o stručnom usavršavanju i u skladu sa Pravilnikom o utvrđivanju zajedničkih kriterija za licenciranje članova Ljekarske/liječničke komore FBiH i članova kantonalnih/županijskih Ljekarskih/liječničkih komora.

Član 68.

(1) Komora oduzima članu Komore odobrenje za samostalan rad u sljedećim slučajevima :

1. Ako Sud časti Komore odredi oduzimanje odobrenja za samostalan rad kao najstrožu kaznu zbog kršenja etičkih principa struke.
2. Ako član Komore obavlja poslove zdravstvene zaštite izvan punog radnog vremena suprotno odredbama Zakona o zdravstvenoj zaštiti.

(2) Rješenje o oduzimanju odobrenja za samostalan rad liječnika se obavezno dostavlja nadležnom kantonalnom ministarstvu zdravstva.

ODUZIMANJE LICENCE

Član 69.

(1) Licenca može biti oduzeta ljekaru/liječniku, privremeno ili trajno.

(2) Komora oduzima licencu ukoliko ljekar/liječnik:

1) ne ispunjava uslove propisane Pravilnikom o utvrđivanju zajedničkih kriterija za licenciranje članova ljekarske/liječničke komore FBiH i kantonalnih/županijskih komora.

2) Komora odredi tu mjeru kao najstrožu kaznu zbog kršenja etičkih principa struke;

3) dopunski rad obavlja suprotno odredbama Zakona;

4) ne plaća članarinu nadležnoj ljekarskoj/liječničkoj komori;

5) u drugim slučajevima utvrđenim Statutima nadležnih ljekarskih/liječničkih komora.

Nedostojnost za obavljanje liječničke djelatnosti

(1) Liječnik koji je pravomoćnom sudskom presudom proglašen krivim za počinjenje krivičnih djela protiv zdravlja ljudi, krivičnih djela podmićivanja i krivičnih djela protiv službene i druge odgovornosti utvrđenih krivičnim propisima Federacije može se, s obzirom na važnost i prirodu ugroženog dobra ili druge posljedice, te s obzirom na okolnosti pod kojima je radnja izvršena, odnosno propuštena, smatrati nedostojnim za obavljanje liječničke djelatnosti o čemu odluku donosi nadležni organ Komore (Sud časti).

(2) Liječniku iz stava 1. ovog člana može biti uskraćeno izdavanje licence, odnosno može mu se privremeno ili trajno oduzeti licenca.

(3) Ukoliko je liječnik pravomoćnom sudskom presudom proglašen krivim za slična krivična djela u odnosu na krivična djela iz stava 1. ovog člana, od nadležnih sudova u Bosni i Hercegovini, odnosno inozemstvu može mu biti uskraćeno izdavanje licence, odnosno može mu se privremeno ili trajno oduzeti licenca od strane Komore.

(4) Nedostojnost za obavljanje liječničke djelatnosti iz st. 1. i 3. ovog člana, kao i u drugim slučajevima koji ga čine nedostojnim za obavljanje liječničke djelatnosti, te način i postupak izricanja ove mjere bliže se utvrđuju Statutom i odgovarajućim Pravilnicima Komore.

XIII - PRESTANAK RADA KOMORE

Član 70.

Odluku o prestanku rada Komore može donijeti samo Skupština dvotrećinskom većinom delegata Skupštine.

Član 71.

“U slučaju prestanka rada Komore, o pitanjima imovine odlučuje Skupština na vanrednom zasjedanju”.

XIV PRELAZNE I ZAVRŠNE ODREDBE

Član 72.

- (1) Statut Komore je temeljni akt i s njim moraju biti usklađeni svi drugi akti Komore.
- (2) Akte Komore donosi Upravni odbor.
- (3) Statut, Kodeks medicinske etike i deontologije, Pravilnik o odgovornosti članova Komore i Pravilnik o finansijskom poslovanju Komore usvaja Skupština Komore nadpolovičnom većinom (50% + 1) prisutnih delegata na sjednici Skupštine koja ima kvorum.
- (4) Ostali akti za čije donošenje je nadležan Upravni odbor usvajaju se u skladu sa Poslovníkom o radu Upravnog odbora.

Član 73.

Prijedlog za izmjenu Statuta ili drugih akata može dati svaki član Komore.

Član 74.

Ostali akti utvrđeni ovim Statutom imaju se donijeti u roku od šest mjeseci od dana donošenja Statuta.

Član 75.

- (1) Ovaj Statut stupa na snagu osmog (8) dana od dana usvajanja na Skupštini Ljekarske komore KS.
- (2) Ovaj prečišćeni tekst Statuta Ljekarske – Liječničke komore Kantona Sarajevo bit će objavljen na oglasnoj ploči u sjedištu Društva, kao i na web stranici Ljekarske komore KS www.lkksa.ba.
- (3) Stupanjem na snagu ovog Statuta prestaju da važe odredbe Statuta usvojenih na prethodnim Skupštinama Komore, odnosno na osnivačkoj Skupštini dana 21.12.2015. godine, kao i odredbe Statuta usvojenog dana 15.05.2018. godine, kao i odredbe Statuta usvojenog 27.10.2023. godine

Broj: 653/2024

Sarajevo, 12.12.2024. godine



Predsjednik Skupštine Komore

dr. Semin Bećirbegović